



Uunga  
Tillie Martinussen  
Inatsisartunut ilaasortaq  
Suleqatigiissitsisut

**Kinguaassiuutitigut atornerluisarneq pillugu § 37 naapertorlugu apeqqutip nr. 2018-184-ip akineqarnera**

Asasara Tillie

Qujanaq apeqqutinnut nassiunneqarsimasunut.

16-08-2018  
Suliap nr. 2018 - 15545  
Akt. id. 8390382  
Postboks 260  
3900 Nuuk  
Oqarasuaat: (+299) 34 50 00  
Naqitanik nassitsigasuuaat +299  
34 66 66  
E-mail: iian@nanoq.gl  
www.naalakkersuisut.gl

**1. Naalakkersuisut kanngutsaattuliorfineqarsimasut pillugit suliniutissatik qaqugu naammassissagavaat tassani innersuussutigissuara § 37 naapertorlugu apeqqutinnut nr. 92-mut akissut aamma qaqugu saqqummiunneqassamaarpa tamanut taamatullu Inatsisartunut?**

Kinguaassiuutitigut atornerluineq akiorniarlugu Naalakkersuisut periusissiaq "Killiliisa" naammassillugu suliareerpaat. Ulloq 20. august aaqqissuussinikkut periusissiaq tamanut saqqummiunneqassaaq.

**2. Qarasaasiami inuit naapittarfiini kinguaassiuutitigut kanngutsaattuliortarneq pillugu pinaveersaartitsinissamut Inatsisartut akuersissutaat qanoq piviusunngortinneqassamaarpa taamatullu nunami maani meeqqat atuariiini toqqissisimanartumik inuuneqarnissaq kiisalu meeqqanik atoqateqartartut groomingertarnerat pillugit ilinniartitsinissaq qanoq piviusunngortinneqassamaarpa?**

Ilinniartitaanermut, Kultureqarnermut Ilageeqarnermullu Naalakkersuisoqarfimmiit paasisutissanik piniarsimavunga, taakkulu imatut akissuteqarput:

*"Atuartitsissummi "Inuttut ineriartorneq"-mi immikkoortumi 'inuttut ineriartorneq'-mi asanninneq, isumassuineq aamma kinguaassiuutit atortarnerat ilikkagassatut anguniagaareerput, matumani atuartut makku ilinniassagaat:*

- *Kinguaassiuutit atorneri pineqartillugit, meeqqanut tunngatillugu, killiliisinnaanngitsunik inersimasoqartoq angisuunillu meeraqartoq ilisimassagaat*
- *Pisunut nuanniitsunut ulorianartunullu ilanngunnaveersaarnissartik sissuissagaat*
- *Kinguaassiuutitigut atornerlunneqarsimasunik pasitsaassaqarunik imaluunniit kinguaassiuutitigut atornerlunneqarsimagunik ikiorneqarnissartik tapersorsorneqarnissartillu pillugu sumut saaffiginninnissartik ilisimassagaat*  
(nukarlerni ilikkagassatut anguniagassaneersut)

*Ulluinnarni ilinniartitsineq ilikkagassatut pilersaarutitut ilikkagassatullu anguniagassanut naapertuunnersoq nakkutigissallugu kommunalbestyrelsip akisussaaffigivaa.*

*Meeqqat atuarianni ilikkagassatut pilersaarutit 2002-mili atuutilerput - naallu oqariaatsit 'qarasaasiakkut inuit naapittarfii', 'toqqissilluni qarasaasialerisinnaaneq' aamma*

'grooming' ilikkagassatut pilersaarutini imaluunniit inuttut ineriartornermi atuartitsissutiniluunniit allani ilikkagassatut anguniakkani immikkut ilaatinneqanngikkaluartut, ilinniartitsisut ilinniartitsinissaminnut piareersaanerminni ilinniartitsinerminnilu inuiaqatigiinni ineriartorneq malinnaavigigaat suliassa qarfiillu ataasiakkaat iluanni pisut nutaanerpaat ilannguttassagaat pissusissamisoorpoq naatsorsuutigineqassallunilu, matumani digitaliusumik ineriartorneq kiisalu tusagassiuutit, isummallu imarisai nutaat ilanngullugit. Oqariaatsit 'qarasaasiakkuq inuit naapittarfii', 'toqqissilluni qarasaasiarsinnaaneq' aamma 'grooming' ilikkagassatut pilersaarutinut aamma ilikkagassatut anguniakkanut nutartikkanut ilanngunnissaat pissusissamisuuginnassaaq.

Periusissiap 'Atuarfik Digitaliusoq/Den digitale folkeskole 2018-2019' atortuulersinneranut atatillugu qarasaasiakkuq inuit naapittarfiini kinguaassiuutitigut atornerluisarnerit pitsaaliornissaannut tunngatillugu meeqqat atuarfiannut suliassa qarfimmi suliniutinik tigussaasunik aallartitsisoqarnissaa kiisalu toqqissimasumik pissusilersornermut ilinniartitsinissaq aamma meeqqanik atornerluisartut groomisarnerannut ilinniartitsinissaq naatsorsuutigineqarpoq.

Periusissaq 'Atuarfik Digitaliusoq/Den digitale folkeskole 2018-2019' ukiuni marlunni ingerlasussaavoq, meeqqallu atuarfianni digitalimik atuinerup sammineqarnerunissaanut ilaasussaalluni, tamannalu aqqutigalugu atuartut ilinniartitsisullu digitalimik ingerlatsiffiusuni arlalinni ilisimasaqarnerulernissaannut iluaqutaasussaalluni, soorlu assersuutigalugu atuartut paasissutissarpassuarnut nassitsisunullu ulluinnarni qarasaasiakkuq naapittakkaminnut isornartumik inissittarnissaannut piareersarneqarnissat - matumani suliassa qarfinni taaneqareersuni apeqqutit ilanngullugit.

Meeqqat inuusuttullu online-imiikkaangamik paasissutissat il.il. naapittakkamik apersuusersuisumik pissuseqarfiginissaannut imaluunniit itinerusumik paasinissaannut piginnaasassatik namminneerlutik ineriartortittanngilaammasuk, taamaamat atuartut paasissutissanik, sakkunik ataatsimooqatigiiffinnillu digitaliusunik atugaqarnerminni pissuserissaarnikkut, apersuusersuisumik, isumannaatsumik siunertamullu naapertuuttumik piginnaasaqarlualernissaannut sakkussinnissaat pisariaqarpoq. Atuartut ilisimaligassaannut qanorlu iliuseqarfigissallugu ilinniagassaannut grooming ilaavoq.

Periusissiami suliniummi 'Digitalikkut perorsarsimaneq'-mi anguniagaasoq tassaavoq meeqqat inuusuttullu internetimi isumannaatsumik atuisinnaanissaasa siuarsarnissaa kiisalu tamaat eqqarsaatigalugu isumannaatsumik isorinnillunilu qarasaasialerisarnissaq - meeqqani inuusuttunilu taamaallaat pinnani, kisiannili angajoqqaavini aamma.

Suliniut 'Digitalikkut perorsarsimaneq' tamaat isigalugu imatut oqariartuuteqarpoq: Atuartut atortut digitaliusut isumannaatsumik siunertamullu naapertuuttumik atorsinnaallugillu attaveqatigiissutiginnissaat ilinniassavaat, internet-imi kukkuluttoqqunagit – tamatumunnga ilanngullugu inuttut attaveqaatini ataqpeqatigiilluni pissusilersorsinnaaneq. Ilutigisaanik assersuutigalugu najoqqutanik suussusersiuinermi, nalilersuinermi, nassuiaanermi taakkualu najoqqutaralugit inerniliinermi apeqqusersuisinnaaneq pingaartuuvoq. Atuarfimmi atortunik digitaliusunik atuinermi isumannaatsuunissaq apeqqusiisnaalerlu pingaartinneqassaaq. Atuartitsinermi atortussat inerisarneqareersimasut pisarineqartassapput, naleqqussarlugillu kalaallisuunngortinneqarlutik.

*Taamaallilluni periusissami 'Atuarfik Digitaliusoq/Den digitale folkeskole 2018-2019' suliniut aqqutigalugu siunissami qanittumi qarasaasiakkut inuit naapittarfiini kinguaassiuutitigut kanngutsaaliornernut, qarasaasiami toqqissilluni isersimasinnaanermut aamma groomingimut piareersimanissamut tunngatillugu suliniummik arlalinnilluunniit tigussaasunik aallartitsisoqarnissaa ilimanarpoq.*

*Ilinniartitaanermut Aqutsisoqarfik aamma Digitalimik Sullissinnermut Aqutsisoqarfik ataatsimoorlutik digitalimut immikkoortortamik pilersitsisimapput, immikkoortortallu sulisut allat allaffeqarfiup iluaneersut allallu avataaneersut suleqatigalugit 'Atuarfik Digitaliusoq/Den digitale folkeskole'-mi sammisat suliniutillu piviusunnngortinnissaannik suliaqassapput.*

*Periusissaq 'Atuarfik Digitaliusoq/Den digitale folkeskole 2018 – 2019' uani nassaassaavoq:*

<http://www.iserasuaat.gl/kl-GL/Folkeskole/Nyheder/2017/12/Atuarfik%20Digitaliusoq>  
[http://www.iserasuaat.gl/da/Folkeskole/Nyheder/2017/12/Atuarfik%20Digitaliusoq.](http://www.iserasuaat.gl/da/Folkeskole/Nyheder/2017/12/Atuarfik%20Digitaliusoq)”

Paarlattuanik siuliani apeqqutigineqartut UKA 2017 imm. 21-mut: Namminersorlutik Oqartussat missingiummut uunga isumaqataanissaat pillugu Inatsisartut aalajangiiffigisassaattut Siunnersuut Kalaallit Nunaanni pinerluttulerinnermi inatsimmut allannguutissatut siunnersuummut tunngassuteqassappata, immikkoortoq taanna 2017-imi ukiakkut ataatsimiinnermi naammassillugu suliarineqanngitsaq nalunaarutigissavara immikkoortup ukiakkut ataatsimiinnissami saqqummiuteqqinnissaa Naalackersuisut pilersaarutigaat.

Meeqqat peqataatillugit pornolianik piginninnermut tunngasunut inatsimmi pinerluttunngortitsinerit annertusineqarnerinik ilaatigut siunnersuut allannguutininik imaqqarpoq.

### **3. Naalackersuisut oqartussaaffiinni nunami maani meeqqanut kinguaassiuutitigut kanngutsaattuliortarnerit pinaveersaartinniarlugit suliniutit maannakkut aallartinneqarnikuuppat?**

Kinguaassiuutitigut atornerluisarnerup pitsaaliorneqarnissaanut atatillugu aamma atornerluisarnerit akiorniarlugit ataatsimoorussamik suliniutip ineriartortinneqarneranut oqartussaasut attuumassutillit, matumani kommunit, peqqinnissaqarfik politiillu ilanngullugit, peqataatillugit isumasioqatigiinnernik ingerlatsisoqartarsimavoq.

Isumaginninnermut Aqutsisoqarfik kommunit meeqqanut inuusuttunullu suliassaqarfiini suliniuteqarnerannut siunnersuinnermik ilitersuinnermillu suliaqarpoq. Kommunini inatsisinik suliaqarnermut tunngasut isumaginninnermilu sullissinnerup nukittorsarneqarnissaat Isumaginninnermut Aqutsisoqarfiup ukkatarai, ilaatigullu kommunini sulianik suliarinnittartunut pikkorissartitsisarluni. Siorna meeqqat tapersorsorneqarnissaannut inatsit atuutilerpoq. Inatsimmi Namminersorlutik Oqartussat kommunalbestyrelsillu sullissinnerminni eqeersimaartumik soqutiginnittumillu sullississasut peqquneqarput. Taamatuttaaq assersuutigalugu sumiginnaanerit il.il. pillugit nalunaaruteqartoqartillugu sunniuteqarluartumik sulianik suliarinnittarnissaannut kommunalbestyrelsit tigussaasumik piffissaliisarnissaannik peqquneqarput. Isumaginninnermut Aqutsisoqarfik 2018-imi ulloq manna tikillugu inatsit pillugu



Qeqertarsuarmi, Kangaatsiani, Aasianni, Ilulissani, Maniitsumi, Sisimiuni, Qaqortumi Upernavimmilu pikkorissartitsisarsimavoq. Ukiamut illoqarfinni ukunani pikkorissartitsisoqassaaq: Uummanaq, Narsaq, Nanortalik, Tasiilaq, Qasigianguit, Nuuk aamma Ittoqqortoormiit.

Meeqqat pillugit angalaaqatigiittartunut Isumaginninnermik Aqutsisoqarfik aamma ataqatigiissaarisuuvoq. Angalaaqatigiittartut kinguaassiuutitigut atonerluinerit pillugit paasititsiniaasarput, meeqqanullu kinguaassiuutitigut atonerlunneqarsimasunut katsorsaasarlutik. Naalakkersuisut kinguaassiuutitigut atonerluisarnerup pitsaaliornissaanut katsorsaasarnissamullu sulinermik nangitsinissaannut atonerluisarnerit akiorniarlugit suliniutinut ataatsimoorussanut suliaq "Killiliisa" tunngaviliissaaq.

#### **4. Meeqqanut kinguaassiuutitigut kanngutsaattuliortarnernik pinaveersaartitsinerit kanngutsaattuliorfigineqarsimasunillu katsorsaasarnissat pillugit suliniutit suut kommunini aallartinneqarnikuuppat?**

Meeqqat tapersorneqarnissaat pillugu inatsit naapertorlugu meeqqanut kinguaassiuutitigut atonerlunneqarsimasunut katsorsaasarnissaq kommunit suliassaraat. Isumaginninnermut Aqutsisoqarfik kommunit ikiorneqaqqugaangata kommuninut siunnersuullunilu ilitersuisarpoq. Kinguaassiuutitigut atonerluinnermut tunngatillugu kommunit pitsaaliuinnermut suliniutaat pillugit Isumaginninnermut Aqutsisoqarfik imatut takussutissaateqanngilaq, tamannami kommunit suliassarimmassuk. Taamaattoq Isumaginninnermut Aqutsisoqarfiup ilisimavaa kommunit pitsaaliuinnermik suliniuteqartartut, suliniutillu kinguaassiuutitigut atonerluinnermut ilaatigut sammitinneqartartut.

Nunatsinni kommunit suliassaqarfimmut ilungersuussillutik suliaqartut Isumaginninnermut Aqutsisoqarfiup maluginiartarpaa, aamma kinguaassiuutitigut atonerluinerit ikilisinniartarlugit kiisalu kinguaassiuutitigut atonerluinnermik pasitsaassaqarnermillu nalunaaruteqarnerit ilumoorullugit tigusarlugit.

Inussiarnersumik inuulluaqqusillunga



Anthon Frederiksen